

LEOIA ETA ZAKURRAK.<sup>1</sup>

Leoi zar samar batek  
 zituben zakur bi,  
 morroitzako artubak  
 bizi nairik ongi;  
 abek ziran serbitzai  
 ta mandatariyak,  
 berari ipintzeko  
 otordu guziyak;  
 bañan leoia ain zan  
 jeniyo zakarra,  
 zeñak dantzatzen zuben  
 noiz nai atzaparra;  
 egun batian berak  
 zituben otso bi,  
 berarekin batian  
 jatera ekarri;  
 eta deiturik bere  
 serbitzai biyai,  
 esan zuben:—Gaur emen  
 gauza ona jarri,  
 ea gusto ematen  
 diyegun oyei.—  
 Eranzun zuten:—Ondo  
 da, bai, nagusiya,  
 egingo da bedorren  
 agindu guztiya....—

Bañan biyak elkarri  
 au esan zioten:  
 «Atzamarrak ugari  
 zizkiguk egiten,  
 ez dek portatzen bera  
 gurekin aĩn ondo,  
 ta kanpotarrak nola  
 diraden izango,  
 beren aurrian oso  
 lotsaz beterikan,  
 alde egin dezagun  
 biyak emendikan....  
 Esan ta egiñ, biyak  
 joan ziran igesi,  
 etzan geyago ayen  
 illerik ikusi.»

. . . . .  
 Serbitzari leyala  
 izan nai dutenak,  
 berak lenbizi bear  
 dute izan onak;  
 bestela gertatzenda  
 uste eztanian  
 alde egin ta geldi  
 estuasunian.

JOSÉ ARTOLA.

(1) Fábula premiada con *mencion honorífica* en los Juegos florales celebrados en esta Ciudad en 1888. (Véase pág. 567 del tomo XIX.)